

宋朝大詔令集

宋朝大詔令集卷第二十

皇后下

廢黜

皇后郭氏封淨妃玉京沖妙仙師詔 明道二年十二月乙卯

皇后郭氏省所奏為無子願入道者事具悉皇后生忠義之門稟柔
和之德風表石符之慶早升蘭殿之尊四教具宣六宮是式而乃秉
心專靜抗志希微慕丹臺絳闕之游狀金妃瑤塔之貴陳請累至敕
諭再三言必踐而是期意益堅而難奪尅循高尚以適素懷宜特封
淨妃玉京沖妙仙師賜紫法名清悟

淨妃等外宅詔 景祐元年八月壬申

朕祇紹慶基務敦靜治每遵勤儉用洽冲寧至于宮掖之中嬪侍之
列維謹充于儀職而靡厚于寵私頃以中闈有虧善道降處次妃之

位仍從別館之居尚邇嚴宸未叶典制郭氏宜令于外宅居止更不入內美人尚氏昨由下陳列于近侍素非令淑但肆驕矜宜特貸刑章令于洞真宮披戴永不得入內美人楊氏自居左右靡蹈箴規宜令出內于別宅安置長秋之重陰教是宣願厥位以難虛必惟賢而是擇當求德閭以稱坤儀屬于數舊之家兼咨甲冠之族將行聘納式助烝嘗曩日母后垂簾兼示慈愛遂有臣僚戚屬進獻女口入宮留處掖庭頗彰物論宜並放出朕常思恬素動守端莊在于聲色之間絕無溺惑之意况每觀古籍備鑒前修上或恣于耽荒下必爭于寵幸虧德敗度莫甚于茲固深念于防閑弗暫忘于規戒自此八月之選無事于訪求九御之口庶臻于簡肅咨爾宰職克輔善猷宣布多方知朕此意

廢皇后孟氏批語

紹聖三年九月乙卯

皇后孟氏縱恣失德密構奇表上則不足以勸範內令下則不足以
章明婦順朕躬稟皇太后皇太妃聖旨恭奉玉音可廢居道館仍賜
四字仙師號并法名仰三省樞密院同定

廢皇后孟氏詔 丙辰

皇后孟氏旁惑邪言陰挾媚道迨從妄驗證左甚明欺辭具乎覆按
無爽朕夙夜惻怛寢食靡寧難以私恩而屈大義躬稟兩宮慈訓奉
被玉音失德若斯將何以母儀萬邦上承宗廟可上皇后冊寶廢居
瑤華宮賜號華陽教主玉清妙靜仙師賜紫法名冲真其居處供帳
服用廩給之類務從優厚稱朕所以始終待遇之意

追命

追冊會稽郡夫人賀氏為皇后制 建隆三年四月乙巳

王者開國承家所以膺厥教慎終追遠所以達幽明爰舉徽章用紆

永恨故會稽郡夫人賀氏流芳閨壺遠事舅姑追惟漢劍之清宜
正軒星之號可追冊為皇后仍令有司備禮冊命

追冊故夫人尹氏為皇后詔

太平興國元年十一月甲子

柔順之德沒有遺範褒崇之制抑惟令典故夫人尹氏含章茂族流
芳戚范淪謝久矣音徽邈然永懷內輔之賢追加中壺之號可追冊
為皇后

追冊越國夫人符氏為皇后制

同上

鵲巢流珠克播于風雅虎鈕為贈載詢于典故越國夫人符氏勲貴
之族淑哲挺生涵泳禮訓優游圖史雖茂關雎之德靡及軒星之位
冢樹將拱淑聲具存爰命追崇以正宮壺可追冊為皇后

追冊莒國夫人潘氏為皇后制

皇口元年六月乙丑

朕仰荷慶靈嗣守基構永言懷舊之感載稽追遠之文聿舉徽章用

飾幽隧故宮國夫人潘氏早以華胄嬪于沖人克蹈圖史之規茂著
河洲之德正名中臺允極哀榮可追冊為皇后

故美人張氏特追冊為皇后制

明道二年

門下夫生有淑美則袂冠于九嬪歿著柔嘉則禮追于中臺此王者
所以彰圖史之懿令輔佐之勤故美人張氏誕自華宗流茲惠問膺
八月之下選冠六列而有儀德備組紉聲齊環珮悲葬部之早謝願
享律之垂遷用思汝麓之祥重進梓衣之制重惟茂典抑有前規嗚
呼位至椒塗名留彤管實邦之媛想內範以空存在河之洲飾徽章
而昌極冀斯威則有慰芳魂宜追冊為皇后仍令所司擇日備禮冊
命主者施行

追冊郭皇后制

景祐三年正月壬辰

生而有貴秩于朝沒則申恤典于第刻密嬪于天極而奄謝于人寰

不舉徽章冒旌遺跡故金庭教主沖妙仙師郭氏鍾曾沙之慶分寶
婺之輝動鑒圖史之規居服組紉之事自玉衣叶兆金堂承榮風施
輔佐之勤益懋閑和之則而乃遺情物表探味淵宗獨抗出塵之心
遂歌塗椒之地靈期邂逅朝露易晞良增悼往之懷載厚飾終之典
嗚呼柔儀永隔內範如存躡三景之從修同千萬化應四星之象復
正于尊名芳魂有知歆我渥命可特追冊為皇后

貴妃張氏追冊為皇后制至和元年正月丁丑

內治經國非選德無以冠後庭正風形家非紀行無以口天臺斯以
舉褒懷之禮申哀恤之文誕告外朝式循前憲故貴妃張氏起絞冕
之緒蹈圖史之規進陪禕翟之容通副軒龍之象有憂勤之助化無
矜靡之流心向以夫內禁之宵嚴犯周廬之夕警靡顧凶焰未衛丹
闈遽閔雨以靖僭方責躬而引咎優援刀而割臂封濡翰以奏章事

既秘而不言物有存而可驗報君憂國望古無倫遽爾長辭邈焉如
昨宜正駟車之御益隆虎紐之章鋪顯豐融用昭慘惻於戲治與嫺
水既表德于女英美載周京尚疏音于大妣尊名茂渥永享休嘉可
特追冊為皇后仍令所司擇日備禮冊命

貴妃劉氏追冊皇后御筆手詔 政和三年八月十九日

朕若昔先王化行天下必得內助輔成厥功貴妃劉氏嬪于初載性
自天成憂在進賢斥遠姦慝卑躬下伐敏行寡言安死生之分達性
命之理能不怛化白氣屬天嗟其云亡宜謚以禮今攬皇后鄭氏所
奏無彼妬忌之行有樂淑女之心親折衷章力為禮懇可以垂訓萬
世表勸六宮嘉其誠心用基王化可依所奏貴妃劉氏追冊贈為皇
后即塋所為園陵置祠殿止以明達為謚餘並依后制務從簡約令
太常寺詳議以聞

明達懿文貴妃劉氏特追冊明達皇后制九政和三年八月十
門下朕于古其訓克綏厥猷眷懷內助之良申錫厚從之典覃敷明
命播告大廷故明達懿文貴妃劉氏從容以和閑美且異慎終如始
寡笑與言無傷善而有憂勤夙夜之心不怛化而達死生性命之理
異香經日白氣屬天分不可踰葬之以禮皇后樂得淑女憂在進賢
珍瘁其亡悅懌其美謂名教之未進存歿之無殊親札奏封析正名
號徽嘉其亡險詖之忌行是用循追崇之舊章表勸六宮垂訓萬世
於戲好是懿行有如象服之宜嗟哉懷人口口彤管之煒往者不可
作已神其尚或享之可

明節和文貴妃劉氏特追冊明節皇后制宣和三年五月庚

門下有憂國愛君之行勸相我家推追往送終之恩率茲常典時惟
懿德孚告大廷故明節和文貴妃劉氏淑慎慧雅而節之以文俊明

肅恭而節之以禮在神霄之府號九華玉真之妃生南極之天實赤
文大帝之女嬪于初載式是六宮振振如螽斯之多莫莫有言覃之
本寤寐思服至于憂勤夙夜在公莫遑寧息進不以諂而以德義不
奉私而奉公懿行莫倫忠言猶在被中宮之鞠有助陰教之儀刑不
伐不矜以和以睦展如邦媛可無身後之餘榮嗟哉懷人具有司存
之恤典用作爾祉實慰我心於戲禮緣于情定循名數之恩限稱其
義用昭終始之全以承王休以光嬪則往者不可作已神其尚克欽
哉可

謚議

大行皇后謚議景德四年五月

臣聞閔睢為王化之基坤元以厚德載物是以椒塗在御正位而聽
內朝慈問既淪易名而示四海流芬亘古垂裕方來奉節惠之文有

不刊之典伏惟大行皇后斗維降口沙麓儲休令質柔嘉懿安純茂
靈符告于石宇吉祥驗于玉衣粵自邦媛有歸戚藩作儷逮事先帝
寅奉皇姑恭順發于誠心正淑表于姻戚銅扉肇啓金匱承榮執纂
組以彌勤服圖史而無數屬嚮明于大寶爰總治于長秋德冠六宮
母臨萬國樛木逮下聿協聲詩大練為衣克敦儉素而又侍養長樂
順承慈顏朝夕勤忻悅之儀行步有珮環之節允瑩壺則式是邦家
所宜永服褱綸勤事種桂而軒星掩曜桂魄沉暉遽謝昌辰靡延鴻
筭皇上悼音徽之如昨念日月之有期爰命下臣仰稽前訓庶方猷
之不泯紀大行以長存著在策書告示宗廟謹按謚法履正忠和曰
莊賢德信脩曰睦伏請謚曰莊穆詔尚書集翰林學士兩京御史臺
官本省六品諸司已上定議以聞天輕清而秉陽乃恢圖覆地博厚
而載物遂正方輿萬彙于是財成二儀以之協濟亦由伉儷重人倫

之本河洲隆王化之基恭惟大行皇后承天清明法地柔順稟汾陽之慶緒襲塗山之令儀主上銀榜升儲謀猷夙效玉宸嗣統輔佐惟黃嬪虞契月旦之明媚周叶天飛之運神宗聖母昔揚賢淑之稱清廟閔宮屢奉吉蠲之祀勤宣四教表正六宮蹈陰陽之和德範昭矣朕圖史之訓善美具焉運迫登天哀經率土顧茲節惠爰命儒臣詳觀考行之文允協易名之典實于有衆無爽至公伏請依宗諱所議

謚冊

莊穆皇后謚冊

后妃之德風化之源法垂象于四星叶休符于五鹿生則建長秋之位取諸漢儀沒則按彤管之書定其周謚所以循節惠之前典表節終之異數大行皇后郭氏坤元毓粹月魄淪精出金穴之華宗集玉衣之瑞命元雲入戶素擁于神休吉夢捫天果歸于帝室逮事先聖

祇若皇姑儷朱卺以開榮進畫堂而增峻粵子繼統乃陟中宮服以
螭虎之鈕虔以椒蘭之殿鍾鼓之禮盛河洲之詠作而能含章體順
率禮蹈和厚德無疆謙光載路言可復于圖史躬必中于珩璜避濯
龍之游恬澹特立引貫魚之列優柔逮下抑制外族述宣陰教眷惟
輔佐屬在賢明方當節用去奢正始敦本先蠶致享率職于紘紃藉
田厥事贊獻于禋禋而祥符素柰蒙結丹墀嬰進賢之心憂勤感疾
虧勿藥之喜奄忽冥升羽蓋虛陳瑤齋罷宴祿祿弗御璋璫空存掩
軒曜之光芒失塗山之翼贊悲經戚里哀動掖庭池綵講儀園陵卜
吉亢徒斯耳練日惟良司典上言追崇克允載詢公議式育徽章今
遣攝太尉工部尚書平章事王旦冊謚曰莊穆皇后垂芳竹帛著範
壺闈永閔音猷良深軫悼嗚呼哀哉

維皇祐六年歲次甲午正月丙寅朔十九日甲申皇帝若曰夫內德之茂非正位無以顯其猷彤史所載非大名無以表其行矧予嬪合之懿夙著徽柔之則生則副珈瑜翟以寵其初歿則祔章懿冊以垂于後褒功節惠踪來舊矣故皇后張氏坤順以大月盈而冲毓秀儒門參儼天極煩擢著于延葛雍和見于流芬自初選納惟德之行琴瑟之音莫不靜好椒蘭之美服媚居多遠貴勢而不處復華寵而能降翼朕偕閔天之盛導予躋黃老之福憂勞臣下永念樛木之仁檢御姻近慨慕濯龍之戒至於盜驚廬徵挺身以衛至尊時丁早暵刺臂以祈來貺愛君之烈何謝古人祓禱難期疹癘斯邁千齡何速一昔而亡奔駒逝川追悼奚及筮龜協吉園兆有期奉常據古稽合二稱朕揆庸較德昭錫徽名公言僉同世繫攸穆今遣攝太尉事推忠協謀同德佐理功臣光祿大夫行尚書禮部侍郎同中書門下平章

事集賢殿大學士上柱國安定郡開國公食邑三千三百戶食實封一千戶梁適奉冊謚曰溫成皇后僊遊遐邇典策是膺茂範存于臺閣嘉問流于緹素音容永閔哽結難勝嗚呼哀哉

相州見詩葛鼎簿汗我私注

哀冊

莊穆皇后哀冊

維景德四年歲次丁未四月丁卯朔十五日辛巳大行皇后郭氏崩于萬歲殿之後殿有司奏謚曰莊穆以其年六月乙未朔二十一日乙卯將遷座于陵臺禮也朱火昏中靈輅風駕搖畫口于素旗咽悲風于廣夏皇帝軫深懷于內殿痛虛位于長秋感辟臺之不御嗟黼帳之將收進轍賓階親臨祖饋爰詔詞臣奉揚遺懿其詞曰厚德載物至哉坤元著明垂象倬彼星軒閔睢教始倪天禮尊章明內治啓迪化源慶屬休辰運鍾元聖諸夏宅心三靈眷命稽若前經述宣內

令玉璽疏榮蘭闥布政文昭貴冑號仲遐枝家承金穴祥開翠螭萬
華瑞命苻萊聲詩女圖是獻象服攸宜列卿承休東朝作儷言無出
閭美敦主饋塗山翼贊周姜思媚譽鵠掖庭禮均婦如允升中壺寅
奉皇口承顏左右上食朝脯待陰郭輔佐唐虞嬪風載祕陰教誕敷
厭翟斯皇濯龍布從江漢化行禕禰禮重薄氏仁善靡微恩寵大家
經書習聞雅頌外戚稟訓謙沖靜退嬪御懷仁祝延飲醉半楚啓邦
周伯私愛褒紀舊章尚辭封拜陪遊溫洛致孝南陵親芳脂澤躬薦
梁盛帝車來復壯魄載盈嬰生板掖火澀玉京嗚呼哀哉顧免淪輝
騰龍變彩地震方興人謠素柰西山樂兮香無期聚窟香兮不可待
歎駕遊兮靡留玉音琤兮如在金釭凝兮夜何長白駒度兮時易改
中庭蔓兮綠草生洞戶寂兮流塵晦嗚呼哀哉宸居愴悼戚里悲傷
痛深臣妾哀極嬀嬀蘭宮兮文史聞蘭館兮公桑掩遺書兮無復視

念故歎兮何時志閔珠襦兮畫梓湛銀海兮元堂望懿藩兮車口從
先后兮雲陽嗚呼哀哉統五鼓兮巖城曙儼六衣兮清吹度陳愍冊
兮祖庭咽邊簫兮上路漣涕兮重瞳吞聲兮長御背直城而右轉歷
重崗而迎驚邈瀟逝之周原指蕭條之拱樹嗚呼哀哉陵園黯兮將
閉景象淒兮若秋瞻樂地池兮永歎覽雲居兮增愁畢九虞兮紉營魄
節口惠兮旌大猷挹遺芳兮彤管詠賢德兮河洲諒音徽之不泯曠
載祀以彌休嗚呼哀哉

溫成皇后哀冊

維皇祐六年歲次甲午正月丙寅朔八日癸酉貴妃張氏薨十二日
丁丑冊諡曰溫成皇后十四己卯嬪于皇儀殿之西階粵某月二十
日乙酉遷座于殿宮禮也素紼整徒靈衣戒御祖饋宵陳違腸晨舉
泣鵠從以成兩黠椒塗而生霧皇帝顧懷嬪刑感切仁哀悼副禕之

不見歎華掖之俄空爰命詞禁紀揚芳風其辭曰黃帝遐源留封景
霄德源慶遙陰華族茂玉勝啓祥珠舉挺芳秀有綽英媛淪精降神擬
整齊寶瞻巫等雲乃瑞紫闥采翔秘宸外毗陽化內參陰政助月成
光均軒騰景六列宗模四業純備繁藻並修組紉成事鑒史求箴稱
詩迪志抑遠外嶺澤無偏暨敦履素約衣無窮麗自頃周虛誰何死
衛驪琴方警當熊已厲近閑時雨責躬戒味齋助虔祝精誠獨至瀝
血書文請咎歸已深誠不言遺毫在紙勤勤爽和晦明生疹醫攻失
痊祿司告口生也弗融天兮難問奄忽之間靈暉道盡嗚呼哀哉拓
館屢闕日懷之應半燭收光方春委盛背明世之豐樂僚幽局而永
逝異今昔于俯仰變燿哀于鑒寐動皇情于遺物悽榮恩于卹禮詔
遏音以盈月當昕朝而廢視嗚呼哀哉榮煥光斷金波影低哀結寒
急楚挽清淒動輜軒兮收霜轉霜旆兮逶遲去復去兮寧復還悲真

悲兮長別離甘泉之像兮空虛名方士之口兮終亦非口口勞之郁
列綿百代而揚徽嗚呼哀哉

宋朝大詔令集卷第二十

宋朝大詔令集卷第二十一

妃嬪一

內職

置淑儀淑容順儀順容婉儀婉容宮司令詔大正神祥庚申
眷言壺教實繫國風辨彤管之等威既存舊制益紫庭之位號亦著
前聞爰考典章用新班秩自今增置淑儀淑容順儀順容婉儀婉容
並從一品在昭儀上又置宮司令一自正四品在尚宮上著之甲令
以為永式

改定尚書內省職掌御筆政和三年五月二十八日

先王之政自家形國自內及外惟我祖宗堯正治官分建百職總核
萬事然乘五代之亂循襲舊制名不稱實惟我神考內設六聯分掌
三省各有常守而宮闈內官尚或沿襲有所未暇朝夕惟念內外家

國理當一體則有條而不紊機政之暇因考古歷改俾各遵承永為定制

尚書內省

內宰二人

副宰四人

總正六司使帥其屬以聽內治掌外省六曹所上之事

吏

都事陸人

主事陸人

錄事壹拾貳人

令史壹拾貳人

書令史貳拾肆人

書史貳拾肆人

內省六司

治視吏部

職事官

內史壹員長

治中壹員貳下准此

吏

令史貳人

書令史肆人

書史陸人

司教視戶部

職事官

三才圖會卷之十一

內史壹員

治中壹員

吏

令史貳人

書令史肆人

書史陸人

司儀視禮部

職事官

內史壹員

治中壹員

吏

令史貳人

書令史肆人

書史陸人

司政視兵部

職事官

內史壹員

治中壹員

吏

令史貳人

書令史貳人

書史肆人

司憲視刑部

職事官

宋朝大詔令其卷第二十一

內史壹員

治中壹員

吏

令史貳人

書令史貳人

書史肆人

司繕視工部

職事官

內史壹員

治中壹員

吏

令史貳人

書令史貳人

書史肆人

進拜上

修儀劉氏封德妃制

大中祥符五年五月戊寅

厚人倫廣風化始于內則施及寰區必妙簡於英淑用登隆於名數
爰稽良日申錫誓書修儀劉氏玉德含章星華毓粹展如邦媛挺出
慶門佩圖史之歲規懋組紉之功緒詳閑內職輝映後庭勤輔佐以
惟賢謹言容而合度是用眷求清懿崇進等威亞中壺以飛聲參列
妃而處青蒲其念禮經之垂訓總嬀御以敦和益著嘉猷聿隆順道
可特封德妃所司擇日備禮冊命

李氏可才人制

大中祥符九年二月丙申

勅某謙祇率禮端懿傳芳自恪奉於宸闈寔存更於歲時久播采嘉

之譽宜推甄獎之恩俾陞嫡侍之榮用勸肅恭之德欽茲寵渥更勵
夙宵可

朱氏掌箚制

勅祗事掖庭典司禁箚必資閑淑爰需寵章司寢長洲縣君朱氏惠
問疑和柔儀著範早奉丹闈之列口涌彤史之規率職有經服勤匪
懈宜從進陟用示旌褒升位序於蘭闥錫恩榮於芸檢荷茲明命益
務虔誠可

朱氏等順容制

勅朕以欽承寶命紹緒鴻圖需綸綍之恩誕敷慶賜眷掖庭之列宜
示褒崇婉容李氏和惠積中柔嘉成德謹言容而有度率歲訓以自
持肅奉先朝允隆陰教功宣彤管譽洽紫闥運屬承祧禮優改館錫
芝函之渥命峻赤綬之寵章益茂淑聲以祗榮數可

臧氏等背儀制

勅朕以荷崇洽之基闡惟新之命茂昭大慶敷洽鴻恩眷紫掖之宣猷錫綈面而申獎淑容臧氏性質微令資稟閑和自先聖之緒臨列內朝之位序珎璜之節克謹於恭儀圖史之言率循於懿範宅宗伊始叙舊載懷特示升崇用申優禮欽承渥典彌謁芳風可

宋惠沖淑儀制

勅朕以荷累洽之基闡惟新之命茂昭大慶敷洽鴻恩眷紫掖之宣猷錫綈面而申獎淑容明真大師宋惠沖性質淑令資稟閑和自先聖之緒臨列內朝之位序而專師虛寂迥厭紛華沐于清淨之風克勵薰脩之志宅宗伊始叙舊載懷特示升崇用彰優禮欽承渥典彌保通腴可

趙氏等尚宮采國夫人制

勅祇奉皇闈典司震禁沍於淑哲幹內職而有經嘉乃寅恭舉朝思
而惟允司簿扶風郡夫人口當大內尚宮司公事趙氏等淑溫居質
柔親成儀率屬紫庭克彰於勤事揚芬彤管允茂於凝猷宜口褒旌特
申崇進佩章之叙式峻於等彝湯沐之封存疏於口字茲為渥命無
忘欽承可

制 淑儀太和宮明真大師朱冲惠特進封賢妃依前明真大師

門下王者緒紹皇圖欽惟祖績言念嬪嬙之舊嘗施輔佐之勤豈有
甄明宜覃優渥淑儀太和宮明真大師朱冲惠生資言德性本柔閑
蘭茂畹而彌芳玉涵仁而滋潤頃備貫魚之序嘗居佩褱之班自高
揖於塵寰久真懷於道妙匪惟鑒於圖史實無染於紛華是用緣紫
掖之業恩獎清都之素尚超于六列進以四妃印綬之榮式從於寵

授絲綸之命姑美於懿名欽此藝章允充令範可特進封賢妃依前明真大師仍令所司擇日備禮冊命主者施行

婉容沈氏特進封德妃制 慶歷五年十月五日

門下朕早膺天緒嗣守邦基眷逮事於先朝寔脩明於內範表賢才之輔佐者婦道之肅莊宜裒靜婉之風特頒徽顯之命於茲殷旦申錫賢書婉容沈氏謙懿成姿閑和有裕華宗挺秀世推台鼎之崇淑德含章心師圖史之訓鄉鄰門閭入備掖庭叙宮職以有榮陳女威而自守造次必循于法度周旋務合於禮經俾從九御之聯進陟四星之位於戲典章斯渥恩意有加惟聖考榮遇之深惟沖人優待之厚往服成命不其美歟可

美人張氏進封貴妃制 慶歷八年十月十八日壬午

門下朕聞王者始風本乎妃德天下內治模厥人倫咨擇邦媛之良

懋敷嬪壺之懿爰推異數誕布公言美人張人陶翁闢之和生慶善之族玉粹其度淵靚而衷以阿保之法自閑以圖史之規攸服光贊內職吐升大猷力蘋藻之至恭毓珩珮之常矩禮以為約謙不忘勞用嘉沖徽顯啟優渥進膺禴翟之貴參亞軒龍之華於戲謹以順承陰教惟穆勤乃輔佐王化所經爾其念夕惕之虔躬日休之裕樛木之逮乎下然後稱仁彤管之記其言予以垂美往席寵命毋忘訓辭可特進封貴妃仍令所司擇日備禮冊命

淑儀苗氏特進封賢妃制

嘉祐二年六月二十三日

門下列妃之宗惟德其選粵咨邦媛寔生帝姬且天家垂文位亞軒星之次而人倫正始事基王化之先矧乎名暎六宮身全四德女圖有監姆訓是承頃佩褕於禠祠嘗先九御屬降嬪於懿主宜正四星爰主舉徽章以成玉則淑儀苗氏性鍾和粹體賦柔嘉動規法度之文

步中珩璜之節加以情隆逮下履弗違譙九韶之音既清遠而合雅
十王之德自溫潤以含章是用冠乃壺儀率夫陰教寵名既重車服
攸崇於戲當懋乃誠無替于善思恭順而為己敦靜婉以凝猷外替
求賢內期節用允席丹韞之貴永流彤管之芳往惟欽哉奉若嘉命
可

德妃沈氏特進封貴妃制 嘉祐七年十二月二十一日

門下朕膺先聖之託臨舊貫之居重思宮籍之英昔預宸帷之侍孰
旌爾止已流彤管之芳肆命于廷載下紫芝之渙恩繇近始教自外
字德妃沈氏賦燕婉之儀秉柔明之德顧乃祖服袞登鼎鉉之榮逮
我真朝居慎掖廷之選自參媚則實右王休悵僊蹕之口遐館離房
而永慕有圖書之誠期專蹈于前規無諛諂之私口略好於內治天
與壽康之福衆高賢惠之風宜冠序於四星並亞儀於中壺茲為異

數以獎風勤於戲化始周南既厚人倫之本祇事大考猶傳皇訓之
存是則寵有以特隆禮不可它擬往膺徽冊永荷嘉祥可

賢妃苗氏特進封德妃制

門下帝居六宮之制率輔於皇猷天極四星之華實裨於壹事朕膺
邦統思穆人倫哀臨妃掖之英化始宸闈之順命龜薦日班綈布朝
賢妃苗氏性資惠明儀度簡肅居蹈威圖之戒動循珩珮之飾八月
良家早被後庭之選平陽別館爰開貴主之祥而能退遠驕華舉思
執乾綸衣奉祭上以贊於后勤彤史流徽下以儀於嬪則庸育德言
之茂益陞位序之隆名以副勞議非勛典而諭九婦之禮蓋視三公
之尊內有進賢之心始安君子之佐維正道然後式于外顧私謁不
可黷于中往服訓辭永綏寵命可

宋朝大詔令集卷第二十一

宋朝大詔令集卷第二十二

妃嬪二

進拜二

永嘉郡君邢氏美人制熙寧

勅閨雎樂得淑女以配君子至于江漢之域無思北禮而鬼置之人
莫不好德何其盛也朕脩身齊家有志于先王之政慎選嬪御以相
內治之勤以爾某氏徽柔懿恭稟自天質以柔旨之美有朱芾之祥
宜膺寵嘉褒序名品爾其思輔佐憂勤之志而自勉以警戒相成之
道則豈惟福履蕃衍於一時淑德令聞固將有以風天下而垂之圖
史也可

婕妤宋氏特封充媛制

勅先王釐建婦職正始國封擬則外朝典司內令朕攬決庶務欽承

兩宮日罔暇於然娛事率從於簡約雖房闈給侍略倣古官而名號
空存常多缺位掌訓四德是為九嬪宜登柔賢用贊雍睦具官某氏
婉嫕淑茂靜閑懿恭素聞圖史之箴動履行積之節相儀椒掖行祚
益新宜視貴於六卿俾秩真於二品永迪嘉譽無忘渥恩可

某氏充媛制

勅古者王之六宮必有婦寺之職所以述宣陰教輔成內治朕若稽
古昔肇建嬪御位不必備唯才德之稱焉具官某氏徽柔懿敏淑惠
靜專保阿之訓有光謀祝之辭屢應充媛之選視秩甚隆非為汝私
於以求助式燕且譽好爾無射當富能訓惟以永年允懷于茲用對
寵渥可

昭容某氏進位賢妃制

元豐五年八月壬子
門下朕惟始基王化是資內德之良崇建婦官莫重列妃之選維時

碩媛蓋正寵名爰告路朝式字渙號昭容朱氏柔明秉質溫惠率躬
傾史問詩進有靜專之善佩環鳴玉退無險詖之私早受福於帝歆
遂發祥於哲嗣誕著成人之德肆膺胙土之封具選嘉辰有稽舊典
越視三公之秩峻超九御之聯以參麗於綸衣益侈榮於彤管揆賢
斯稱錫命惟新於戲緩御邦家朕欲廣儀刑之治憂勤夙夜汝勿忘
輔佐之誠祇服訓辭往其無斁可特進位賢妃仍令所司擇日備禮
冊命主者施行

賢妃周氏進位德妃制

元豐五年十二月丁巳

宮闈六列實基王者之正風天極四星蓋輔朝廷之內治肆冲人之
嗣統荷皇祖之詒謀維時邦媛之良曩預宸帷之侍宜盼渙號敷告
群倫賢妃周氏世系高明性資靜婉居則服保阿之訓動則聞環佩
之音誦德家之篇嘗著後庭之法奉增成之寵蚤聞貴主之祥時將

及於結褵禮方嚴於築館載褒柔度加飭徽章仍膺綸翟之華序陟
軒龍之亞服雖維舊位則愈隆於戲爰在進賢故以視三公之重坐
而論禮蓋將緝四德之休往蹈訓辭永綏涯命可特進位德妃

賢妃朱氏進德妃制

元豐七年正月甲寅

門下王宮六寢允資內德之良天極四星昭著列妃之象朕稽百王
之故實紹五聖之燕謀位號雖蕃選納尤簡方茲登於邦媛俾輔佐
於坤儀賜於外廷詔爾群辟賢妃朱氏秉誠淵塞賦性溫恭八月良
家登豫增成之列三公視秩進膺綸翟之華而能謹環佩之音師保
阿之訓高襟錫美屢陪弓韜之祠吉夢應占載協熊羆之慶是用俯
循舊典陞青隆名以始國風以論婦禮於戲寤寐思服關雎樂淑女
之逮警戒相成雞鳴陳賢妃之道勉躬柔度往對珠休可特進位德
妃仍令所司擇日備禮冊命王者施行

德妃苗氏進位貴妃制

門下成周之隆六寢基始正風帝嚳之立三妃明章內治眷言邦媛
業侍宸嚴肆頒徽冊之文播告路朝之聽德妃苗氏承華慶閭蒙寵
後庭仁祖御圖已荷表嘉之暎英皇入侍益殫保護之誠陟降歷年
終始一意帶弓就列陪克祀於燕禴考室應占發嘉祥於他夢越升
華序浸廣休聲屬于纂承恩有展顯擢冠軒龍之亞進膺禴翟之華
以答舊恩以蕃異數於戲率循四教載光德教之篇輔佐三朝益茂
增成之法往綏優渥用協勞懷可特進位貴妃

德妃周氏進位淑妃制

門下朕以眇躬獲承鴻緒席昊穹之眷命荷仁祖之詒謀永言邦媛
之良嘗預宸維之侍其字顯冊以詔庶工德妃周氏德協後庭體符
法相早以良家之選進當君子之述鳴玉退朝嗣休聲於彤管賜環

就列占吉夢於平陽向紆綸翟之華已陟軒龍之亞肆予緒紹申命
褒崇進以隆名蕃之異數以懋柔嘉之德以昭輔佐之勤於戲思念
進賢光繼二南之美優游論禮更升三事之聯往迪訓辭永綏涯命
可特進位淑妃

邢氏進位淑妃制

門下朕誕膺駿命獲紹寶圖恭念先朝之模率循列聖之治媚嬖多
闕選納尤稀永惟內德之良嘗預中闈之侍其碩顯冊以詔群倫邢
氏世系高華性資婉嫕居帥保阿之訓動循環珮之音潛邸輔陪早
預雲龍之會彤闈眷與屢開弓韜之祥位序浸隆舉重彌顯屬繼承
於大統思獲序於後庭欽念前猷申加美號秩既陞於二列品益冠
於六儀於戲毓德柔嘉已奉增成之寵秉心共養永承長信之顏往
服徽章益膺繁祉

秦晉國安仁保佑夫人張氏特封吳楚國安仁賢壽夫人制
元祐

勅朕允懷先帝替履之道率皆當今宮掖之貴而況擁佑聖賢夙夜
有勞光寵燥濕之役行兼保傅之賢覩致治於承平誠有功於當世
封吳興楚寶居四海之上游既壽且賢殆兼五福之美報號名之盛
前後莫倫明發有懷匪以為賜

婉儀宋氏特進位賢妃制 紹聖四年二月二十日

門下正始之化先齊其家追遠之情無加於孝維時碩媛逮事先朝
若古有章淑辰錫命婉儀宋氏柔嘉順叔懿敏靜專克勤勞於王家
實輔佐於君子夙夜儆戒而有相成之道寤寐思服而無傷善之心
惟列考之在天永言昭配念王姬之築館茲逮有行用祇率於孝思
以申加於品序播告在服延登列妃進超九御之聯上直四星之次

於戲惟清共爾位則可以聽天下之內治惟肅雍其德則可以對前人之宏休尚肩乃心以永終譽可

婉儀劉氏進位賢妃制 紹聖四年九月二十八日

朕若昔大猷是基王化隆厥士女御于家邦肆求婦德之良往踐宮官之貴豈寧有衆猷告大廷婉儀劉氏淑慎其身柔嘉維則寤寐思服而有進賢之志夙夜匪懈而無私謁之心屢占吉夢之祥益彰彤管之煒朕富有四海憂勤萬幾九御之嬪靡克四妃之位全闕惟邦之媛於國有章用率籲於師言以申加於異數於戲脩六宮之職實尊貳於母儀形四方之風將化成於婦道爾克勤則衆用弗惰爾克正則衆用不頌朕其享無疆之休爾亦祔永綏之祿可

淑妃周氏進位賢妃制 元符三年正月二十日

門下朕丕承基緒思御家邦用敦正始之風誕布惟新之命眷時淑

媛申錫茂恩淑妃周氏懿範肅雍今儀淑慎本萬單之節儉志卷耳
之憂勤教婦學之法於公宮正王化之基於天下佑我烈祖格于皇
天迨茲續繼之初肆有褒嘉之舊祇循國典加進宮官於戲對揚王
休首陟四妃之首明章婦順永為六寢之光服我寵榮益綏壽嘏可

淑妃邢氏進位者妃制

朕惟嗣服若古有章用崇建於婦官以始基於王化眷時邦媛申錫
茂恩淑妃邢氏淑德柔嘉今猷懿美內忘女工之事外知臣下之勞
無險詖私謁之心有警戒相成之道佑我烈考格于皇天屬纂紹於
基圖肆永懷於謨訓申加位號敷錫命書於戲叙于王宮登進列妃
之冠化以婦道往對前人之光服我寵章益臻多福可

賢妃米氏進位德妃制

門下朕紹天明而嗣命基王化以齊家風自上行施由近始眷言邦

援申錫茂恩賢妃宋氏嫡則柔嘉壹儀恭靖早被良家之選茂承君子之述有閑睚樂得之心有鷄鳴相成之道佑我文考格于皇天屬嗣守於丕圖方適追於先烈申加寵典登進列妃表正婦官協成陰教於戲無違宮事已推樛木之仁正是國人益彰彤管之美欽承休命往介天祥可

昭儀武氏進位賢妃制建中靖國元年十二月十七日

門下朕紹開聖緒承保天休適遵先猷肇稱盛祀外則霽麗鴻於海寓內則昭慶善於宮庭眷惟邦媛之良業預宸闈之侍選肆盼徽號敷告路朝昭儀武氏躬稟懿姿動順彝矩聲揚環珮雅中步於咸韶夢協熊羆早占祥於莞簞夙事永裕實生賢王有寤寐思服之心得警戒相成之道柔嘉自昔淑慎于今朕惟昭考在天之靈靡瞻匪德報伯氏因心之義莫重顯親霜露之思無窮兄弟之恩致美是用超從

九御升冠六儀以均上帝之隆以旌內德之茂於茲彤管有煇進參
綸程之榮華等相輝更起珠襦之慕祇勤法度懋迪龍光可

安康郡夫人劉氏等可並封國夫人制

勅具官某氏等朕繼隆聖緒二年于茲矣苟有功於國者雖邈然孤
外之人猶且褒陟再三而況宮闈之內乎以爾護視朕躬既久不懈
疏榮顯郡未稱勛勞用進錫於國封以寵光乎禁掖欽承休命永保
壽康可

文安郡君張氏等可並封郡夫人制

勅具官某氏等朕繼隆聖緒二年于茲矣苟有功於國者雖邈然孤
外之人猶且褒陟再三而況宮闈之內乎以爾佐佑朕躬服勤夙夜
疏恩錫號亦既彌年用增易於郡封以寵光乎禁掖惟時休命勿替
欽承可

掌珍薛氏等可並封典字制

勅具官某氏朕於掖庭之內雖未嘗以名器做人而久於服勞者亦必有以報焉以爾列職交脩協成衆務不改司存之舊就遷品秩之榮尚勵夙宵以圖未效可

尚儀楊氏可封即夫人制

勅具官某氏爾總率官屬以脩禮儀起居之事蓋已久矣有勞可錄寵賜卽封勉對恩榮勿忘祇慎可

掌設張氏可封典字制

勅具某氏自掌封典其品異矣凡厥庶賜視以為等以爾服勤張設之久故以是遷焉勉稱服恩勿忘祇恪可

隨龍任氏可並封掌字制

勅某官官由掌字而上始預品秩蓋未嘗輕授也以爾實自潛邸

侍朕縉圖凡一時遭遇之人既已在所陟可不以是為爾榮哉勉稱
異恩勿忘祗恪可

仙韶副使王氏可掌樂充仙韶使依舊管幹仙韶公事制

勅具官某朕方宅憂無所用樂汝既久於其職當遷矣朕亦安得而
止哉然九重之外不可尹曉宜識此意務遠嫌疑庶朕慎獨之心賴
以信于天下可

才人鄭氏可特進封美人制

勅天下之本在國國之本在家二帝三王以來未有家齊而天下不
治者也朕率是道以臨萬邦厥有衆升必先內德具官某以祿事左
右秉心肅恭勤能畏於歲規居弗形於私謁慶襲後宮之盛肇開元
女之祥懿範聿昭淑聲益茂宜遷美號以示隆恩惟克勤於初終乃
永綏於福祿往其思稱助我化風可

掌簿李氏可知尚書內省公事制

勅具官某氏朕不以名器假人盖非特外廷為然也惟時內省之務方賴協濟之勤時爾久勞肆加遷陟往其祇慎益勵夙宵可

宮人朱氏可掌珍制

勅某氏宮官由掌字而上始預品秩所以謹名分而嚴勸獎也惟時宵旰之事尤資贊助之勤審求其人肆以命爾往其祇慎以稱恩榮可

典簿韓氏司言等制

勅具官某氏等宮官六尚之屬雖以品秩為差非恩俾遷焉亦何由而進乎此朕于汝等所以錄歲月之勞而陞典司之任也往循名分益務恭勤以無愧乎朕命則惟汝嘉可

宋朝大詔令集卷第二十二

宋朝大詔令集卷第二十三

妃嬪三

進拜三

神宗乳母張氏進封制

遠施深仁所以來終吉殊榮異數所以答前勞比稽載籍之傳式旌宸掖之舊天且助乎順人不以為私神宗皇帝乳母韓魏國保聖贊慈安仁賢壽惠和夫人張氏慈惠躬持柔明自稱親邁千齡之會備榮五福之繁神考膺圖功早隆于阿保眇躬失恃居允賴於擁全顧口之勤罔辭夙夜始終之愛積有歲年肆遵緒承嘗加褒衍雖錫十字疏地兩邦曾未足稱萬一而厭予志也是用虔越舊章發揚顯號峻超列品增畀大名寵膺報禮之隆益介壽祺之永可

婕妤鄭氏進封婉儀制

六儀之職所以上佐坤儀而教四德非緣茂恩異數蓋不可致方生
大禮錫賚有加必自內庭以及外閭婕妤鄭氏柔懿惠和克勤訓則
動遵盛戒夙夜相成宜進位於嬪嬙示益彰於寵渥可特受婉儀

婉儀鄭氏進位賢妃制
崇寧元年十一月七日

門下仰以觀天上取四星之象坐而論禮外侔三事之尊國有列妃
世無虛位欲正人倫之本必資邦媛之良爰詔大廷肆頒顯冊婉儀
鄭氏徽柔淑哲和懿靜專率禮稱詩實稟真於高冑宣慈流化遂冠
德於後宮動則聞環珮之音居則視歲圖之戒已襲嘉祥之繁衍尚
稽寵數之褒崇循按典章申加位號序陟軒龍之亞服參禴翟之華
其表正於婦官以協成於陰教於戲關雎之思窈窕而無傷善之心
卷耳之知勤勞以有進賢之志貽訓自昔承休在今尚祇服於茂恩
庶永綏於多福可

充儀張氏進位賢妃制 崇寧二年三月三日

門下朕嗣守邦圖緒紹祖服延眷嬪嬙之舊蚤推輔佐之能彤管流芳著五朝之懿範綸衣錫命分六服之寵章播告治度誕口口聽充儀張氏秉秉明之則諧燕婉之儀法度幽閒言容靖順有淑哲之行故過於昭陵有寬裕之心下決于朕御顧年德之並茂且名號之未崇用嘉沖淑肆啟優渥參稽往則進陟列妃以獎夙勤以敦異數於戲位峻軒龍之亞秩侔公袞之崇王化是基禮文絕等往膺休顯永介壽康可

賢妃鄭氏進位淑妃制 崇寧二年五月三日

門下六寢建官率備高華之選四妃辨位尤尊淑哲之名眷言禁掖之英實預潛藩之舊其頒渙號以告治朝賢妃鄭氏天資醇恭世係良顯親值聖人之興運茂為君子之好迷感會風雲涵濡雨露承休

襲慶屢占弓韜之祥履正蹈和常謹珮環之節教行九御秋視三公
適誕布於湛恩肆優加于寵典進升位序敷錫命書以旌輔佐之功
以懋柔嘉之則於戲風惟正始朕方綏御於家邦德必慎終汝尚愛
勤於夙夜永膺榮祿益遠徽猷可

淑妃鄭氏進位貴妃制崇寧三年二月二日

門下朕紹承基緒綏御家邦將彤四方之風必叙六宮之職眷惟懿
媛風冠後庭誕舉徽章用孚群辟淑妃鄭氏柔明而靜慎端懿而惠
和閱圖史之誠而無矜侈之心謹環珮之音而有謙畏之行令猷口
出衆譽翁歸自膺瑜翟之華已亞軒龍之次荐頒渙渥口懋寵榮屬
賢嫔之騰輝濟仙源而毓秀既受帝祉益增厚於慶基以承天休宜
載加于命數是用進陟四妃之首並昭一品之崇茲率籲於師言匪
獨專於予惠於戲恩禮隆顯密貳於母儀德化流行克章於婦順惟

口險詖私謁故無傷善惟能輔佐憂勤故能進賢茂介多祥永綏厥位可

婉儀王氏進封德妃制崇寧三年七月二日

門下古者選建列妃協脩陰教外則視儀於三事上則應象于四星必惟其人乃命以位朕內求輔佐慎擇柔良六宮之制雖存五年之口弗備延登邦媛教告廷臣婉儀王氏稟懿淑之資飭端壹之行崇謙約而有士君子之操樂靜慎而得古賢女之風蚤陪祀於燕禴已荐占於熊夢弓韜之應曾靡自矜禴翟之華口當中錫比屬長羸之候繼膺蕃行之祥蓋三索而得男是萬邦之永履賢而多于無愧於前聞思以稱情宜參於內治進厥官官之峻亞于王后之尊超始命之寵榮踐再加之位叙惟受帝之祉既渥故有邦之典特隆於戲象服是宜口其容者德必稱彤管有煒載其美者實必孚口既錫美于爾

窮予則懋昭于爾善爰頒猷訓永迪吉康可

德妃王氏進位淑妃制崇寧四年八月四日

門下天極垂文上著四星之象王宮設職內嚴六寢之官以端本於人倫以始基於邦化眷惟懿媛甲錫茂恩協以剛辰告于列位德妃王氏儀度閒肅性資惠明動循珩珮之音居臨歲圖之戒端靜好德無私謁之心溫和能仁有逮下之志屢卜維熊之夢荐膺多子之祥寵至而無驕譽隆而益挹自登禴翟之貴已亞軒龍之儀屬寶婺之分輝復天孫之毓秀既玉承於帝祉宜茂對於邦光是用進淑哲之隆名舉褒崇之顯冊以侈宸闡之慶以昭宮掖之賢於戲先齊其家朕既克明於至德相成之道爾其益勵於徽猷尚遠休聲永綏多祐可

賢妃王氏進位德妃制政和元年正月四日

門下朕祇若詒謀聿脩內治庶爾女士欲歸厚於人倫宜其室家用
始基於王化惟爾媛久集叢蘆繼生嗣賢來多昌緒蓋舉褒隆之
典誕彰蕃衍之休敷告大廷以敬顯冊賢妃王氏柔明淑慎端懿誠
莊遵圖史以撻躬謹珮環而率履章克考室已符種稂之祥弓韜祠
禩嗣啟熊羆之兆延涓嘉旦茂進寵名煥諭翟以增華炳軒龍而動
色載崇禮命兼腴情文匪出朕私實由邦慶惟謙恭所以自牧警戒
所以相成往服訓言永綏壽祉可

婉容崔氏進位賢妃制 政和二年二月十三日

門下王者崇建婦官適宣陰教等其位敘庸昭淑貴之權協以情文
厥有茂恩之典眷時碩媛蚤侍宸闈萬生嗣賢增侈昌祚用率循於
成憲以猷告於外庭婉容崔氏冒自德門體凝法相性溫恭而靡忒
姿淑慎以多儀顧史問詩追有含章之美友琴流行進無傷言之心

保慶譽以積躬襲休祥於考室無謀錫類載茁於蘭芽熊夢獻占繼
蕃於椒實俯揆師虞之揚宜曆異數之加參六寢以陞華視三公而
峻秩有光帝祉式輔壹契於戲以御家邦用正王風之始施于孫子
彌膺親屏之彊爾惟無忝於好逑朕亦奚勞於思古往祇明訓益茂
徽聲可

德妃王氏特進位淑妃制 政和二年二月二日

門下隆化基而正始必資內德之求弼陰教以齊家莫重列妃之選
若時碩媛克茂徽聲備宣夙夜之勤茲襲篚莞之慶肆時厥位敷告
在廷德妃王氏溫惠柔嘉齊莊靜一昔鍾英於甲族蚤登御于宸闈
率禮稱詩匪佚箴圖之訓進規退矩靡愆環珮之音綏燕御以宅躬
集善祥而錫類禱祠應祝以誕降於天材星要儲輝式載生于帝子
協邦彝而懋龍昭間則以陞華榮躋懿淑之崇祚峻公台之右騰芳

禴程增耀軒龍於戲警戒相成有鷄鳴之陳古寤寐思服樂聞睢之
進賢迪惟令猷豈愧前躅欽予時口其爾之休可

賢妃崔氏進位德妃制政和三年十一月十二日

門下正心脩身所以假齊家之道論禮教德所以形治內之風乃眷
掖廷蕃推碩媛中錫高華之秩用嘉審衍之休敷告路朝式宇群辟
賢妃崔氏令儀柔惠懿範溫恭動循環珮之音居閱圖書之誠薄言
采采應弓蠲於禘祠宜爾振振占旆旗於吉夢益廣天文之慶繼開
寶婺之祥雖無冊之備膺顧容功之愈茂稽遵成憲叙陟龍名衣參
禴翟之禁位亞軒龍之貴以司輔佐之職以美和平之期於戲關雎
無傷善之心樂在好述之得卷耳有進賢之志詎聞私謁之行予惟
克舉於典義爾亦永綏於天祿爰頒猷訓往迪吉康可

淑妃采氏進位貴妃制政和三年三月十七日

門下朕紹承丕緒茂對闕休永念先猷敢怠遵揚之志申褒內德用
昭敦叙之仁眷言邦媛之良久茂宮闈之懿宜頒渙號具詔明廷淑
妃家氏資稟粹溫行循柔惠頃逮事於昭考實克相於有家粵繇初
元誕育上嗣德已尊而彌邵寵既加而愈恭肆踰耳順之年備著躬
行之美允膺顯冊尚位亞妃居緣環珮之音每起羹牆之慕懷熙豐
之前烈欲報何窮撫嬪御之舊人所存無幾是用載稽彝典加錫隆
恩爰登冠於號名以進超於位序秩次軒龍之肯服參榆翟之華禮
命併崇情文交稱於戲適逢來孝斯式厚於徽章淑慎其身尚永終
於慶譽往欽猷訓益介壽祺可

淑妃王氏進位貴妃制 政和四年三月二日

門下佑民而作之君齊家以治其國觀天極四星之象賁亞軒輝攷
王宮六寢之名蓋參坤厚時惟邦媛夙備婦官申錫贊書之華載褒

彤管之煒肆消穀旦敷告路朝淑妃王氏性賢惠明德容婉嫕柔嘉
縱則淑慎其身履順體和居閑圖書之戒發祥降嘏屢陪弓鞠之祠
扶已視於三公教素行於九御謙以自牧貴而不驕茲符堯章之占
益廣本支之慶冠列妃而進位哉中壺以開榮禧典有稽師言惟穆
於戲既受帝祉叶螽斯多子之詩以承天休膺禴在成章之禮益
思譽慶仰稱龍光可

德妃崔氏進位貴妃制 政和六年七月三日

門下明章內治必資六寢之官協贊中闈九重四妃之選若時英婉
夙侍宸庭丕承蕃衍之休式厚褒崇之數宜乎有衆猷告在朝德妃
崔氏植性柔明持身淑慎居守箴圖之訓警戒相成動循環珮之聲
威儀是力寵既加而愈畏譽益顯而彌恭茲陪祀於燕謀已占祥於
熊夢誕膺帝祉存育大孫茲襲慶於昌圖宜加崇於顯冊爰進超於

位序以登冠於號名均龍三公陞華一品庸彰恩紀允示眷懷於威
教于公宮既克循於義訓化以婦道尚勉迪於前聞益輸輔佐之勤
以正儀形之治往祇新命茂對繁禧可

婉儀劉氏進位賢妃制

政和六年十二月十日降

門下朕誕受厥命先齊其家正王化之基必資於內德惟人倫之本
尤重於列妃眷言邦媛之良夙贊震闈之治降爾遐福荐膺蕃衍之
休惠我無疆申錫褒崇之典肆消穀旦猷告路朝婉儀劉氏淑慎柔
明溫和慈惠祇承善訓檢聞詩禮之言允蹈令儀咸中珮環之節自
居近掖克紹徽聲蚤陪弓韜之祠繼獻熊羆之夢屬仙源之分派實
寶嬰之騰輝庭對多儀載歌顯冊秩次軒龍之首服芬綸翟之華寵
峻三公榮居一品爰舉邦彝之舊匪專朕志之私命以時敷禮惟情
稱於戲則篤其慶已叶螽斯之衆多永孚于休尚摠鷄鳴之警戒用

正儀刑之始益輸輔佐之勤仰稱龍光毋忘訓告可

宋朝大詔令集卷第二十三

宋朝大詔令集卷第二十四

嬪御四

進拜四

宮人王氏可特封楚國夫人制政和

朕政先治內儀在廣恩眷茲禁掖之良宜錫命書之寵具封某氏持身口靜賦性柔和蚤膺選擇之榮入預邃嚴之列著勤口於夙夜履溫惠於宮庭爰示褒揚甫隆顧遇開䟽封於大國既渙徽章顯仁德於嘉命名更綏眉壽欽承懋渥益介純禧可

婉容王氏進位賢妃制政和元年十一月八日

門下二南王化之基實肇功於內治四星天極之次粵示象於列妃眷予邦媛之良共乃婦官之事載占祥於蕃衍肆錫命以褒崇稽叶口辰誕敷顯冊婉容王氏懿柔德茂洵美性成靜口陰教之修進叙

宸闈之侍坐而論禮思在求賢願口口詩居有藝文之訓佩環鳴玉
動惟典則之循既欽弓獨之祠延章門悅之設荐膺休應寢陟龍名
朱若斯皇已獻熊羆之夢彤管有煒宜參禴程之華彤風四方視儀
二口口承於帝社以下穆於師言於戲御于家邦輔思齊口口之
盛永錫祚嗣開既醉萬年之昌益懋緒功以綏福履可

淑妃劉氏進位貴妃制政和二年五月一日

門下繼體以紹天明正始以基王化荷帝眷佑行國本支載占考室
之祥嗣保宜家之慶竄字明命敷告多方淑妃劉氏洵美觀淵惠柔
順淑華如月之方皎德猶正而更溫葛之章兮可以歸安於父母鸞
既鳴矣又能儆戒於夙宵以形四方以式下土昔在南極神宵之府
是為九華玉真之妃表甲午之陽光載震載風應壬辰之昌運無害
無苗用率舊章進登位叙實天所佑非朕汝私於戲古我明王化成

婦道姜嫄口于帝口大任媚于周姜故子孫有姦斯之多族姓應麟趾之厚往口九宵之託以儀萬國之風無專美於前人以永綏于爾祉可

冊文

冊肯妃張氏文

維慶曆八年歲次戊子十二月乙丑朔三日丁卯皇帝若曰夫上憲皇極協教陰教顧推四妃之列亞于長秋之位正始王化以御家邦咨于淑哲是謂時內肆發顯榮仰惟舊章美人張氏淵敏居質醇和賦口口黻冕之令族稟圖史之懿戒柔明維則克茂媚風婉嫕含章詎煩姆訓肆予涼薄纂大正構樂口邦媛參叙宮職始明悞于選納見勤勞于輔佐宜伸褒拜乎我德瘳蓋澣衣示儉婦道予以從訓摶本逮下風人予以流詠寵命既輯爾實宜之今遣使左諫議大夫參

知政事龐籍樞密副使右諫議大夫高若訥持節冊命爾為貴妃於
戲祇率九御贊于壺則惟勞謙可以處其貴惟肅雍可以成其美式
永來譽不其建歟

冊貴妃沈氏文

維嘉祐八年歲次癸卯二月癸酉朔二十一日癸巳皇帝若曰夫國
風之始以厚天下之大倫陰教之修以助王者之正道顧予涼昧奉
若基序眷言別掖之英逮事先帝之室維年德之並茂且名秩之未
稱稽來往冊之懿登冠列妃之華咨爾德妃沈氏淵粹惠間柔明端
覲幼蹈儀矩不待姆師之訓初被選納蓋出公相之族鳴玉節動陳
詩戒盈展如邦之良媛疑然天與遐福朕仰欽聖烈之餘悅懷宮籍
之儀維爾有輔佐之力早經於大謀維爾有澣濯之工下式于群御
茲庸表迪懿實敷錫徽數亞于軒龍之象不謂不崇衣以綸翟之衣

不謂不寵愍物既渥獨辰既良咨合僉謀答揚顯命今遣使禮部侍郎參知政事歐陽脩副使樞密副使左諫議大夫胡宿持節冊命爾為貴妃於戲內治起化外姻戒權相祭祀以時則有周家之禮在斥險謁之行則有漢史之論明當識恩禮之來以綏賢令之止遂永終譽不其美歟

冊賢妃宋氏文

維紹聖二年歲次丁丑四月朔某日甲子皇帝若曰昔我烈考克明德慎行正身齊家燕及九御靡不祇告肆予冲人丕承厥志罔敢忽怠以祈協於前人咨爾婉儀宋氏淑慎懿恭逮事先帝夙夜儆戒克有燕譽是生王姬于茲有年釐降以禮是用口循彝典率籲眾志進于列妃以作爾祉今遣使通議大夫守尚書左丞許將副使中大夫守尚書右丞蔡卞持節冊命爾為賢妃夫惟在天之德對越未遠永

言配命孝思惟則乃授口口增光無窮於戲匪難其初惟克厥終是惟口口尚克口口以口天之休豈不韙歟

降臨

降封晉氏等制

正	郎	口	口
白	夫	口	口
氏	人	口	口
降	陳	口	口
授	氏	口	口
典	降	口	口
正	封	口	封
司	穎	封	扶
蜀	川	鹿	風
王	郡	西	郡
八	君	郡	大
降	司	夫	人
按	闍	人	樂
典	馬	任	口
贊	氏	氏	口
	司	降	口

勅齊氏等大行勤政遠屬以口彌留爾等展昏祇事左右而乃隱覆掩蔽初不以聞奄棄萬邦痛何所及推原罪戾殆不勝誅罰以示懲尚為寬典可

貴妃崔氏降為庶人制宣和四年七月二日

門下家道尚嚴茲迪正邦之始法行自貴蓋由示衆之公儻華內輔之良難道成形之議制乃明命告于外朝貴妃崔氏蚤以常材濫預妃列光依宸極在輔佐於憂勤榮動掖庭宜絕情於妬忌而乃之采

順進賢之志溺姦回罔上之私惶惑竒表陰行媚道散賢產以掠衆
譽泥術數以構虛聲呪詛同列以及於死生指斥中宮而形於切害
談命數以激后福挾厭勝以及乘輿失德若斯至公敢廢典念二南
基化賢淑旣愆三典糾民重輕奚濫究治備至左驗甚明獄詞具字
按覆無爽何以儀刑宮壺倡率九嬪聊褫妃秩之隆往就庶人之等
審求憲律尚示涵容於戲以明其威義取稽於克愛自詒伊戚事實
果於速辜服我寬恩勉爾悔慮可

追命

故秦國延壽保聖夫人劉氏改號秦國成聖繼明夫人詔咸
平元年九月丙寅

故秦國延壽保聖夫人劉氏仁淑內脩柔明外洽中壺奉謙和之則
掖庭揚履庇之風朕獲嗣丕圖仰承聖緒自臨大寶常祝脩齡永言

哺育之恩敢忘賢明之德孰謂不臻肩壽庵閩重泉因思成聖之由
逮至繼明之治盡憑恩煦致此緒承爰錫嘉名用申卹典可改號成
聖繼明夫人所封秦國如故

雍正元份母任氏贈太儀詔景德二年七月己酉

故任氏頃由令淑入奉先朝景命不融德音早謝先靈永閔歲祀存
更矧吾同氣之親方重維城之寄永懷慈訓深念劬勞追命之恩慰
茲孺慕可贈太儀

故貴儀曹氏可追封賢妃

勅仔著盛門沒有令名念賢善之早淪寢逾年祀顧褒崇之口稱益
峻品儀以嗣故貴儀曹氏參服憲言交脩懿矩選自元功之後嬪于
禁掖之中逮事先朝早從厚夜收神惟寂緬大素之何歸留範彌芳
藹秘庭而未已申脩茂典追寵賢妃用昭恩禮之殊且旌才德之茂

惟淑靈之未泯尚名號之是歆

故尚宮柳氏追封華原郡夫人制

勅掖庭之嚴並建康職尚宮之選爲在令人生而積服米之勤歿則
修追榮之數國有顧舊典顧可弭忘具官某氏祇事禁省厯年茲多
莊靜謹良迄無罪悔奄忽物化怛然興懷其疏大郡之封仍錫小君
之號尚茲幽窆知享異恩可

藩邸故知宮楊氏可特贈尚宮制

勅某氏靜專柔良夙事藩邸逝日愈遠賢聲不忘秋以尚宮掖庭高
選永惟冥漠膺此顯榮可

大內內侍省尚宮趙氏贈崇德夫人制

勅先朝差擇女士以輔陰教侍御左右罔匪正人矧茲六宮之選必
脩四教之法奄然淪喪宜極哀榮以爾名族之英掖庭之舊行應圖

史言中物則彤管有輝既傳好德之芳象服是宜無愧飾終之典庶
幾幽壤服我寵章可特贈崇德夫人

故賢妃楊氏贈貴妃賜謚懿靜制

昔我神考御于家邦深惟三代受命之君必先女德稽若二南正始
之道以協國風選建列妃輔成隆教朕仰稽先烈克廣德心其於褒
崇義所兼盡故賢妃楊氏頃緣嬪則之茂選獨掖庭之良雖不有年
尚存遺範朕降禋祀先帝於清廟彌極孝思顧念元豐之舊人矧惟邦
援盡哀卹典追責禮容其陟增成之尊序膺禴翟之列慎終追遠庶
以答楊先烈之餘節意易名抑以奉順神靈之既焜耀蕃渥昭明等
威謚法溫善柔元曰懿慎守其德曰靜合此二名詔于百世雖是春
秋寔宥之事既極哀榮庶幾山河象服之儀以稱宸德可特贈貴妃
仍賜謚懿靜

故賢妃林氏特贈貴妃制

朕遵仰景旣荷上帝博臨之休親御大廷輯神禹告成之瑞益廣祚
福被于臣工逮茲寵靈無有幽顯而况被遇先帝篤生賢王其於追
崇義無不答故賢妃林氏頃緣女德之茂進預掖庭之良脩位列妃
收華早世存更慶眷之久未極褒崇之稱雖不有年尚存遺範朕肇
裡文考於清廟彌極孝思顧念元豐之舊人矧惟邦媛乃因介弟之
請益厚同生之親豈無卹章以慰追遠母以子貴若古聖人之言人
亡器存嘉爾寒泉之慕進膺禴程之寵序陟增成之尊昭明等威焜
輝典冊維是春秋寔宜之事既極顯名庶幾家服山河之儀以稱容
德尚其不泯服此茂恩可特贈貴妃

故美人錢氏可追贈婕妤制

勅朕緒服以來涵泉之澤覃及外方而况宮闈左右嘗為神考之所

禮遇者予追加育贈顧曷可已具官某氏蚤以柔順應于選求助成
坤載之儀光映史書之美奄至大故久已厯年追朕嬪御之宗庸示
惻傷之意惟茲異數實視上卿冥漠有知聿其欽享可

建安郡夫人張氏可追贈儀國夫人制內降劄于係隨龍人
勅具官某氏朕於一時攀附之人生既加厚歿亦如之所以隆褒賁
之恩全始終之意惟爾淑慎祇事有年奄忽亡亡動我心惻自郡而
國追以為榮尚其榮魂識此命數可

劉氏可贈燕越國安和順懿靜穆恭恪夫人制

恩隆疇昔仁及始終載嘉宮掖之良申錫命書之寵具封某氏稟資
溫靖飭已端莊早侍禁嚴克謹柔之和範久膺眷遇備殫夙夜之勤
奄其淪亡深用軫惻宜進封於二國用增賁於九原仍加節惠之名
併示追榮之禮緬懷冥漠諒克欽承可

宮人楊氏可贈燕魏國夫人制

勤勞之舊當念於始終眷禮之隆必兼於存沒誕推渙涯昭示至恩
具封某氏儼恪端莊溫和平淵靚夙預宮庭之選歷奉五朝具膺福祿
之綏迄臻高壽賢稱茂著懿範猶存顧時昔之可懷宜褒揚之特異
爰作九原之寵肆加二國之封尚想淑明克承休顯可

宮人馬氏可贈充國夫人制

服勤于內既克盡誠加惠厥終所宜致厚誕昭眷禮申錫命書具封
某氏德稟純和性專柔靜自參華於宮掖曾弗懈於夙宵茂著休稱
存膺多祉建從冥漠猶軫懷爰推求舊之仁肆有追榮之典非之
望國肯及泉塗尚其有知歆此無數可

宋朝大詔令集卷二十四

九

宋朝大詔令集卷二十四

宋朝大詔今集卷第二十五

皇太子

奏請批答

天禧二年宰臣向敏中等請建儲第一表批答

省表具之朕以崇建儲闈具存方冊我國家接九皇之洪緒席二聖之永圖卜世綿長累功深厚恢復疆宇混并寰區肆予纂承馴致熙盛奉顧懷之寶命畢封祀之上儀基業斯隆本枝攸重皇靈眷祐元子挺生列茂親朱卽之賢輝先帝綠車之慶示之以明誨佐之以通儒而能勤于受經樂于聞道稟仁孝以特立賦溫文而夙成方務敏材期于主鬯卿等愛君志切體國誠堅爰率具寮猷形露奏徵求典故稱述藏獻請升儲副之名願濟邦家之美聿遵舊典備見精忠雖衆之傾輸實足多尚而朕之審固有所再思欲其更俟長年彌高令

德乃俯從於公論庶允叶於通規咨示群倫體茲深意所請宜不允

第二表批答

省表具之朕以承積累之慶基席豐融之景既獲致混一爰臻治平
嘗觀立愛之文尤重光親之道粵惟元子允謂宗英克岐嶷以夙成
見粹和之發外而自疏封進律寵之以大邦溫故知新輔之以瑞士
歲時未幾聲實有孚樂善居多問安不置謹橫經而就博勤侍膳以
承顏日茂風猷自符儀矩雖開榮於未邇適聞禮於紫庭卿等昭合
嘉謀明徵往誥思繼海雷之象盛推主器之賢特拜表於金門願建
名於銀榜已頒批諭復覽奏章爾志誠堅予心有待欲耳齡之漸長
俾德業之彌隆方議升儲斯為得禮亦如前詔當體素懷所請宜不
允

第三表批答

省衣具之王者奉宗稷之大居億兆之尊必建元良用崇乂壺所以
增皇器之重承天序之隆保有邦無疆之休垂百王不易之典商周
享國千祀由茲道焉惟我祖宗功格上下肆予緒嗣恢致隆平蒼靈
顧懷真系昭顯敷錫鉅瑞闡揚鴻儀宸構愈隆皇家多慶誕生聖子
是為元儲稟正氣於高明體奇姿於淵揚禎祥夙著英釁日新禮樂
之文匪資於審諭孝謹之度蓋發於精誠而自授以旌麾錫之寶玉
分茅亦社侍膳紫庭入則康色而問安出則正躬而臨下榮聞遐被
德器大成卿等伏聞露章盈庭奏請稽皇王之偉制陳監撫之盛容
願啟東闈聿歸上嗣朕始雖恭讓內則深思此乃嚴奉恭盛保寧基
業信為公共安可固違當惟永圖用正萬國俯從群志式協靈心將
舉徽章良增慶悅所請宜依

建立

至道元年立皇太子制

王者茂建皇極惟懷永圖勵宵旰之勤所以和其庶政立儲副之位所以貞乎萬邦朕獲緒丕基誕膺景貺四夷以之內附八表於是攸同臻于太和以育群品維卜年斯永仰承天地之休而主宅猶虛曷契人神之望稽諸舊典是舉義章皇第三子特進檢校太傅兼侍中行開封尹兼管內河堤等使上柱國壽王某符彩昭融智謀宏遠聰明文武本於天賦之才孝友溫恭發自生知之性而自分封大國出尹京師居惟秉謙動必由禮約已靡登于馳道事親無懈於寢門恪慎厥躬祇勤古訓推樂善好賢之德彰愛民育物之心是宜承祧廟之尊為邦家之本踐于守器允叶重離宜立為皇太子改名某仍令所司擇日備禮冊命

天禧二年立皇太子制八月甲辰

朕繼紹慶基寅恭寶命緬懷聖緒祇守大倫詳觀方冊之書具載典
彝之訓古先哲后臨御中區何嘗不崇建天枝登陰國本謹玉符之
命召口象輅之威容適及昌期顧茲上嗣欲懋脩於三善繫永正於
萬邦爰揆嘉辰誕頒明制皇子崇仁保運宣德守王功臣建康軍節
度管内觀察處置等使開府儀同三司守太保兼中書令行江寧戶
上柱國昇王食邑五千戶食實封貳千叁百戶某惠和天賦聰敏夙
成發自妙年蔚為令器趨紫庭而遵教造丹床以問安孝本因心禮
皆中度而自毓英徽于蘭殿進封時于金壇佐以儒臣導之經術春
誦之功匪懈日新之德彌高乃眷具僚三陳封口冀陟元良之位用
符歷代之文仰法前星俯從群辟念宗祊之所賴命乇毫而是司僉
議大同官占協吉重明貳極不其盛歟可立為皇太子改名某仍
令所司擇日備禮冊命

治平三年立太子制十二月壬寅

維我祖宗繼天統業積有功德克享上帝之心肆其子孫永承百世
之祀朕祇纂謨烈詳覽古今繫崇建於元良實保安於國本上尊宗
廟孝無大於奉先下庇生民教莫逾於居正式宣顯冊教告庶邦皇
子具官某英粹日躋中和自至仁義充涵之美言動惟時禮樂交錯
之華威儀可象抑畏䟽封之重敏脩典學之勤亦既多聞足當大受
是宜誕膺徽命肇啟儲闈懋升明兩之輝益廣口三之道非余私于
爾某惟天祐于余家衍宵祚之靈長成宸扆之慶賴往慎厥德以答
揚列聖之光訓不曰休哉可立為皇太子仍令所司擇日備禮冊命

元豐八年立皇太子制

三月甲午

門下建儲非以私親蓋明萬世之統主器莫若長子茲本百王之謀
朕荷天地之貺臨席祖宗之詒燕延瞻上嗣之貴蚤應前星之祥宜

告大廷誕揚丕號皇子彰武軍節度延州管内觀察處置等使檢校
太尉開府儀同三司持節都督延州諸軍事延州刺史上柱國延安
郡王食邑六千四百戶食實封貳千壹百戶某溫文日就膺知風成
方回馳道之車能止班輪之駕辨正南陽之情允符東海之休自疏錫
於王封益光華於德望勝衣視膳淵然孝反之資好禮受經不煩師
傳之訓誨是用歷盛陽之嘉日舉列聖之大章肇正青宮肆頒顯冊
以口難明之吉以條天下之心於戲立愛始親商以成千歲之業建
嗣必于漢以撫四海之民斯為永圖往膺殿典可立為皇太子仍令
有司擇日備禮冊命改今名

皇長子出閣立為皇太子御札政和六年三月十六日

若昔明王誕受厥命建立儲貳以條天下之心朕嗣無疆大歷荷天
之休誕育元良是居長嫡長子桓年遠志學冠于治朝百辟具瞻主

器之良惟宗廟之重父子之恩考稽舊章正位東宮明兩承離為國大本可以來春出閣立為皇太子其建宮室設官屬與儀物制度宜令有司討論典禮前期辦具以聞邦家之慶與四海共之咨爾中外具體茲意

政和五年立皇太子制二月十四日

門下若昔先王必建儲貳以隆萬世之統以係四海之心朕撫世承平念國大本適迨來孝垂裕後昆永惟承業之艱莫如主器之長咨爾萬邦之有衆聽予一人之告猷皇長子少保武昌軍節度使定王食邑九千七百戶食實封叁千壹百戶某孝友得于天資溫良成于日就出學外傳率履無違既冠祚隋其儀可象方景命有僕介壽考之萬年而明兩作離兆本文之百世蔽自朕志格于天心孚告大廷申錫闕冊夫慎乃德惟忠惟孝欽汝止惟幾惟康用克相於我家以

對揚於休命可立為皇太子

赦

至道元年建儲赦八月壬辰

王者紹膺寶祚必建儲闡春秋垂立嫡之文易象著明離之位所以重邦家之本承宗廟之休斯古今之通制也朕續承丕構夙夜惟寅荷蒼昊之垂休致寰區之咸乂載惟仁宅之主實繫人神之心爰舉徽章式遵成憲皇太子某性念仁義體備溫恭妙識出乎機先盛德充乎宇內踐於明兩非此而誰肇啟青宮懋昭鴻緒發前星之彩既耀於皇圖因少海之波宜孚於慶澤可大赦天下云云於戲王元良之位允協至公推曠蕩之恩用博博愛咨爾兆庶當體朕懷

天禧二年建儲赦

八月十五日

門下王者丕承天序利建皇儲隆永世之徽章率御邦之通制前星

少海稽法象以洞分游震重離者典經而具在朕庸膺正緒祇續寶
圖知繼體之大端有光親之古訓思文聖考垂裕本枝深仁勵黃屋
之心積善致綠車之慶粵子元子發秀妙年挺岐嶷之殊姿賦溫文
之茂德天機幼敏王度夙成令儀恪謹於承顏純孝恭勤於閭閻既
䟽封乎列卿彌駿發乎美聲擇以端良命為僚佐克探微於四術宜
示正於萬邦諒濟主器之賢往踐繼明之位已頒成命言肇立于青
宮載協惟心俾均覃於洪渥可大赦天下云云於戲登隆上嗣禮盛
於元良浹洽輿情慶流於率土爰被需然之澤盡遵詒厥之謀誕告
域中式宣朝旨

治平三年建儲赦十二月癸卯

門下王者承天立極莫不思長世之圖為國建儲所以正萬邦之本
故朕親先父子而天下皆以為愛命發朝廷而天下不以為私粵余

上嗣之良稟自日躋之聖出而就傳寢窮學肄之聞入則承顏勤至
寢門之問比䟽榮於王社益修德於天枝顧荷丕基之艱猶虛正體
之貳矧漢文命嫡著于即祚之初年且夏后與胥期以傳家於萬世
惟群元之所集實大器之所承式符少海之祥宜踐東朝之位肆顯
柔業之丕發嘉念言之大同爰契惟心用軍曠澤可大赦天下云云於
戲文昭武穆風詒燕後之謀震長離明本有承華之象蓋義重乎先
則禮必亟舉慶施序上則惠必遐流咨爾庶方當體朕意

元豐八年建儲赦七月三日

門下父子一體也惟立長可以圖萬世之安國家大器也惟建儲可
以係四海之望位序早定而人莫不以為悅典禮極崇而衆罔敢以
為私永惟上嗣之賢實有妙齡之譽入而視膳孝友見於風成出則
好書聰哲繇於自得粵紹休於正統猶虛位於東朝爰考著龜之占

通稽方冊之寶載消吉旦肇闢青宮周家先親不敢忘廟社之重夏
后與子蓋以順天人心宜覃曠恩偏暨群品可大赦天下云云於
歲離明震長絛帝緒於億年解吉渙亨灑天仁於萬物蓋禮之所行
者大則澤之所流者深咨爾多方體予至意

政和五年建儲赦天下制二月十四日

門下朕若昔大猷受天明命永惟萬世之統有開必先簡在上帝之
心克昌厥後我有元嗣既冠祚階方時安平預建儲貳蔽自朕志乎
告大廷涓選嘉辰誕授顯冊以隆宗社之本以係夷夏之情非朕敢
私膏天所祐豈特予一人之慶亦惟爾萬邦之休可大赦天下云云
於戲治國孰先齊家主器莫若長子肇稱盛典均霑湛恩播告群倫
體茲至意

至道元年冊皇太子文

維至道元年歲次乙未九月甲辰朔二十四日丁卯皇帝若曰朕受乾坤之眷祐副兆億之推崇旰食宵衣納隍馭朽兢兢業業日慎一日故能躋動植於壽域致華夷於大同載稽古先歷覽圖史萬邦之本元良是貞守器承祧莫斯為重徽章解禮自我而行蓋皇王之盛典也咨爾壽王粹稟天地量吞海嶽忠孝備於君父友愛惇乎弟兄逮刑政禮樂之源著宣慈惠和之美邁五官之才藻叶九齡之吉夢洊雷攸震重離克明早分茅土實尹京邑誠以接物仁以撫民每見賢而思齊知為善之最樂予懋乃德嘉乃勲庸安閑承華俾膺主鬯詢彼中外契于普適今冊為皇太子改名某於戲正身足以率下去邪在乎勿疑罔弗昌言必邇端士企大中之道鑒無逸之篇戒矜伐則功愈高師勩儉則福彌久日新爾令望永保我丕基勗之哉欽承

簡冊之休命

天禧二年冊皇太子文

維天禧二年歲次戊午九月庚申朔八日丁卯皇帝若曰夫以天下
為家者三王之通制居正體之貳者萬世之大本明嫡之建爰主於
宗器元良之重以正乎庶邦國家德源深長孫謀錫美丕承積累之
慶保定儲副之位所以經大猷而暢淳熙也咨爾皇子崇仁保運宣
德守正功臣建康軍節度管内觀察處置等使開府儀同三司守太
保兼中書令行江寧尹上柱國昇王食邑五千戶食實封叁百戶某
冲粹居質聰哲成性鍾清寧之孚佑表徇齊於羈貫生而知於孝愛
天攸縱於其能奇智夙彰英聲外發書社南絕毓德少陽勤至寢門
樂游講肄資弦誦以崇術儀星海而昭象寶極凝祐官師率和公言
丕賜與詠胥洽永惟長發之禔慎固守成之業明兩攸屬僉謀大同

式闡承華以旌上嗣今冊爾為皇太子仍改名某於戲體仁而不違
于以濟衆好謙而自牧乃能服民惟正人之務親惟前言之多識師
儉而固介祉於無疆寶慈以持錫善而不遺一乃心而祇肅永來譽
之廣淵往欽哉勒宣令圖以對越我祖宗之景命不其韎歟

治平四年冊皇太子文

惟治平四年歲次丁未正月庚戌朔十九日戊辰皇帝若曰夫天地
有大命其受靡常也予不敢墜厥序祖宗有大器其承匪易也予不
敢私其傳蓋春秋之誣立嫡以正諸侯夏后之時因賢以家天下豈
不聿群心而慮萬世也咨爾皇長子崇仁保運功臣忠武軍節度許
州管内觀察處置等使開府儀同三司檢校太尉同中書門下平章
事使持節許州諸軍事行許州刺史上柱國潁王食邑三千八百戶
食實封壹千貳百戶珣躬濬明之資迪溫儉之德動而合先王之典

言而適當世之變出就齒學不厭詩書之樂其志篤於古也入親色養不忘朝夕之愛其行盡於孝也矧以地極真王體鍾上嗣名愈就而勤愈倍寵彌至而畏彌積固足以定保元儲之位進承宗廟之事天時既符人情既叶不幾夫少海急十里之淵重職先萬物之然歟今冊爾為皇太子於戲天地之命太子其恭之祖宗之器太子其上之知君臣之分不可踰則率民莫如忠知父子之義不可加則率已莫如孝往欽我慎厥初惟其終以答揚予一人之休命

議政

常程事委皇太子與宰臣樞密以下齊善堂會議施行詔天禧四年十一月庚午日

朕荷元昊之眷懷承二聖之詒燕園宅於神州之隅總制于環海之濱順考大猷以御群品罔敢逸豫馴致治平維宗佑之發祥誕元良

之或體日躋有裕天質夙成備對壽衡迺達政經之要延詢望苑動
遵德教之規固已博約乎六藝之言佩服乎三司之訓習聞妙善茂
著溫文然以軍國之事機刑治之得失尤資肄習用熟見聞伊乃宰
司盤于機軸實惟同體參掌萬樞宜竭訏謨聿申裨贊已各降制命
並兼東宮職任眷言同德茲謂老成日接元子之遊慰于庶民之望
自今中書樞密院諸司該取旨公事仍舊進呈外其常程事務委皇
太子與宰臣樞密使已下就資善堂會議施行訖奏噫周階三善但
循齒讓之儀漢客四人遂成調護之績矧吾衡軸佐此緝熙念固本
之是圖實保邦而多慶咨爾中外知朕意焉

答皇太子讓資善堂議常程事表詔

天禧四年十一月庚午

國家祇荷慶靈克昌寶祚眷惟主器之重允資立愛之賢順考推猷
聿申誕告以卿孝恭著美聰哲秉義挺其日躋之能彰厥時敏之用

矧惟一德之輔暨于老成之人左右參禪周爰講貫式貯交修之績
副予善任之懷何遽奏封脩形譙抱勉遵成命即斷來章所諫宜不
允

辭免

皇太子辭恩命第一表批答天禧二年八月十七日

省表具之國家舉三代之宏綱從其古道觀重離之著象垂于正經
慎守供基丕承聖緒伊露章之抑至貢確論以彌堅且徵震屯之文
永踐青宮之位顧惟肯請於自純誠卿爰稟粹和雅符善慶毓質倚
蘭之殿呈祥映日之雲暨進䟽封愈勤就傳克茂川升之德蔚為天
賦之賢公議有推元良允屬三上言於北闕願立志於東朝已降俞
者仍宣霑澤咸觀抗表未拜明恩雖崇讓之辭敦風可尚而升降之
典成命已行采切嘉稱即當遵奉所諫宜不允

皇太子辭免恩命第二表批答

省表具之王者獎元良之德貳宸極之尊博考前聞具存葉制眷言
立愛允謂推公繄以邇之攸司固宗祊而是守矧熙朝之令典實先
聖之詒謀奉而行之斯亦宜矣卿率膺洪慶挺秀英姿克寬克仁自
符於皇祖聞詩聞禮夙造於紫庭增脩四術之功恪謹三朝之禮啟
吳都而進律侍漢幄以承顏憶昨致辭大臣寧周多士叩帝閭而成
列貢囊奏以達誠願建儲闡以隆國本回詔諭而甚至屢傾輸而不
移已徇輿情特頒明制何再陳於讓表猶曲叙於謙詞當拜命書式
遵朝旨所讓宜不允

皇太子辭免恩命第三表批答不允仍斷來章

天禧二年八月

省表具之國家欽承駿命長發靈源荷天地之玉祥恢祖宗之淳耀
思崇大本用建元良況乃禮重承祧易尊守器惟親是屬方冊具存

蓋已毫以攸司冀樂盛之式奉卿地居上嗣象與明離盛德日新英猷天縱表溫文於三善允協姬經彰輝潤於四重克符口詠民有恩志朕所注懷考百王不易之規覽群臣宜建之請誕敷明詔用示至公乃拜囊封載陳展坐精誠尤至沖讓宜加然念邦國永圖皇王偉則在昔先帝固嘗眷予今茲徽章是用命汝雷遵鴻典即斷來章所讓宜不允

皇太子辭免恩命第一表批荅 元豐八年二月

省表具之朕獲紹燕謀奉承聖緒永惟任重靡敢皇寧厯觀先王之所行與夫措紳之口口皆以謂蚤建太子所以尊宗廟衛社稷夙興夜寐不敢忘於心以爾有聰哲之姿溫文之德故斷自朕志詢于僉言而發明詔也以爾正體以係天下之心其任豈不重乎及覽奏面願迴成命宣朕所以注待之意哉往其欽承勿庸謙避所請宜不允

皇太子辭免恩命第二表批答元豐八年三月

省表具之立嗣必子所從來久矣故三代之時天下治安至于千有餘歲者用此道也朕稽之古昔法之祖宗升德器建春宮者將以成萬世之業也及觀刺奏欲避奏寵名雖為謹之風可激當世而升儲之典已告大廷往服徽章勉懋厥德所請宜不允

皇太子辭免恩命第三表批答不允仍斷來章

元豐八年三月

省表具之朕惟王者臨照四方必進元良立儲貳者豈將私于親親哉將以司乂豈為萬世無疆之休矧予元子德器夙成蚤有中外之望此朕所以發明詔也三閱奏章庸以命汝注即欽服以副朕懷所請宜不允仍斷來章

皇太子辭免恩命第一表批答政和五年二月八日

省表具之朕奉天明命若昔大猷惟時邦昌肇建國本以卿地居長

嫡性稟元良純粹聰明拔于倫類忠和孝友靡侍師承育德日新進
學時敏藏於朕志俾正儲闈以係億兆之心以司七帑之重當國家
之閑暇衍社稷於靈長無疆惟休有秩斯祐遽披奏賻備整惻誠雖
自抑之心在謙冲之足尚然已行之命豈渙汗之可回宜趣欽承無
勤訓告所請宜不允

皇太子辭免恩命第二表批荅不允仍斷來章

戊午年八月

省未具之朕祇遵昌圖紹隆令緒永念口宗之重必資主器之良舉
子惟賢立嫡且長眷予上嗣提秀妙齡稟性粹精宅心淵懿能本由
於天縱學無俟於月將夙著英聲益隆令聞望涓中春之穀旦遵歷世
之舊章肇啟宸宮密陪宸極已頒顯命深契輿情乃首封章備形誠
懇願謙冲之足尚然渙就之已孚五愛惟親雖人倫之大本以長則
順贊天下之至公宜體眷綏母勞訓告所請宜不允仍斷來章

謝恩

皇太子謝恩命表批答 天禧二年八月

省表具之朕承上真之淵系恢列聖之丕猷撫育臣民尊崇廟社眷
言守器允屬惟親是以仰奉靈心俯從群請爰啟少陽之位式登元
嗣之賢卿正氣所鍾英淑特異執經之禮天賦于勤誠問膳之容日
形於喜氣慶兼家國舉詣朝廷俾奉來歲以隆基緒削章斯至叙謝
尤多省閱之餘嘉注良切所謝知

皇太子謝賜御製詩元良歲表批答 天禧二年九月

省表具之夫建以儲闡允隆於宗嗣勗之儒學式助於溫文永惟主
器之賢尚示向方之訓卿凝猷獨立敏議混成率由天賦之材馴致
日新之道榮分玉契出處而有常洞啟銅扉詳延而斯盛特頒詩什
魚錫歲規教雖尚于溫柔詞未偕於清壯達予明誨資乃茂功俄上

表以披陳頗推誠而恭順嘉稱彌切眷愛逾深所謝知

皇太子謝天安殿受冊禮表批答

省所上表今月八日詣天安殿受冊禮稱謝事具悉王者厚繼體之親所以資博愛委主器之重所以歸至公斯振舉於舊章罔率循於先訓卿卓爾韶茂穆然粹精挺生岐嶷之姿方盛遠條之德朝論允屬國儀用彰授以冊書升為儲副嘉禮明備旭日晏溫神人叶符中外怡悅俄拜章而叙感表事上以增勤言念益恭聿懷多尚

慶賀

宰臣向敏中等賀建儲表批答

天禧二年八月

省表具之游雷著象具載於前經陪柱推賢式隆於舊制眷溫文之茂德彰岐嶷于妙齡暨進王封愈親儒術雖克勤於就傳亦無闕於問安孝合天經學臻日益俾承顏於漢幄方示戒於湯盤繁乃輔臣

建諸列辟累明從而上表固懇請以升儲已順輿情特頒明詔卿等
慶其適願深于致誠仍首賀章允為多禮口嘉稱注屬稿予懷所賀
知

知樞密院曹利用等賀建儲表批答

天禧二年八月

省表具之王者撫臨區宇纂紹基圖伊有國之宏規在元良之重寄
身予上嗣挺秀妙年居然令姿混成德器自日親於友傳常志在於
詩書寵以進封旌乎樂善俾聞道而漸訓方以月而繫時惟乃近臣
暨夫群士咸旅庭而致奏願稽古以建儲既敦諭而不回遂俯從於
勤請卿等樂聞嘉禮仍首賀章過形慶抃之言備見忠純之懇其為
多尚無已予懷所賀知

答中書密院乞免皇太子答拜表詔

天禧四年十二月丁酉

屬以元儲方親事典聿存體貌式待機衡前制斯明常經是率卿等

忽陳封奏過執謙恭嘉歎之懷寤興無已所請宜不允

建牧

皇太子開封牧制

門下訓五經之趣既隆父子之至恩正八命之儀爰篤君臣之大義
朕誕膺寶緒寅奉慶基建國本者十年存毓承華之德固皇圖于億
載肆推立愛之仁咨爾朝紳聰予詔綽其稟孝反之性賦聰明之才
位重前星而動不洽於謙恭望尊少海而居必先於勤儉聿新業履
開正言而與正人克慎猷為學古訓而師古事淑質斯就今名益彰
夫進于道者政有不足行通于理者民有不足治懋東闡之脩蘊既
觀妙善之風試南衡之極煩宜展阜成之効是用特頒渙號申錫威
章靡徇前代之舊聞悉考本朝之故實增壯春宮之體彌昭震器之
光匪徇私恩實符公道於戲下九重之命非由左右大臣之言司十里

之畿尚賴遜通群彥之助欽承眷注益勵乃心可除閑封牧餘依故事主者施行

納妃

選皇太子妃御筆 政和五年三月空日

朕嗣有令緒惟懷永圖御于家邦預建太子若古之訓揚于大廷以篤君臣父子大倫之恩以立宗廟社稷萬歲之本無彊惟恤申命用休年既冠于阼階禮及時而有室必立之配以宜其家可令有司選皇太子妃仍討論典禮以聞

朱伯材女孺人朱氏充皇太子妃制

門下朕祇承天序懋建儲闈既假有家式厚人倫之本用求厥配助成王化之基眷乃懿親惟時淑女誕揚顯命敦告羣工少傳恩平即王朱伯材女孺人朱氏毓德粹溫秉心淵靜以祇以順夙資天性之

良有言有容允蹈公宮之教家風素勛祖澤重延慶在後人譽聞當
世出自欽成之裔來媚上嗣之賢朕臨御治朝講明盛禮措紳在列
金石充庭爰親飭于通臣肆丕成於慶事拂龜既吉薦鴈甫新宜侈
門休以昭異數燦然儀服之盛中以冊書之榮國典有稽師言惟穆
於戲合二姓之好是謂政先形四方之風率由近始尚迪丕嘉之則
往恩盛饋之恭克稱龍光永膺燕譽可選元皇太子妃仍令所司備
禮冊命主者施行

追命

皇兄贈太尉中書令追封周王謚悼獻元祐追封皇太子仍
舊謚制

門下朕祗荷鴻基紹承先烈念惇親之義莫重於天倫舉飾終之文
特優於禮典皇兄贈太尉中書令追封謚曰悼獻元祐炳靈真冑襲

慶瑤源信厚本於天資聰明稟乎神授純孝之性鍾愛於先朝樂善之心雅推於公族未正青宮之位早經厚夜之悲歎駒隙之易遷瞻陵樹而將拱是用載稽舊制爰議追襲懷同氣之親彌增於感悼備元儲之贈用極于哀榮英魂有知歆茲寵數可特追贈皇太子仍舊謚曰悼獻仍令所司擇日備禮冊命主者施行

哲宗子鄧王贈皇太子改謚獻懿制

朕惟先皇帝在位十有六年憂勤庶政夙夜靡違祇適先猷功被天下皇嗣克生降年不永重惟繼序不忘之義宜盡因心則友之恩用詔有官中頒顯命哲宗皇帝子贈太師尚書令兼中書令鄧王謚沖獻茂性生知庶幾日就命之弗淑人以惻嗟肆朕續承載加贈典原念初詔恩禮未隆非所以上慰在天之靈稱朕報施之萬一錫之命數正位儲宮尚其精誠知克嘉享可特贈皇太子仍改賜謚曰獻懿

宋朝天詔令集卷第二十五